

四庫全書

子部

欽定四庫全書

山堂肆考卷二百八

明 彭大翼 撰

果品

菱

格物總論菱陵也一名芰一名水栗莖上有刺花黃
白色有數種或四角或三角或青苞或紫苞八九月
間熟淮漢以南凶年以菱為蔬又玄都觀翠水中菱
如飛雞故名翻雞菱仇池筆記菱花開背日芡花開

向日故菱寒而炎煖

屈到屬祭

國語屈到有疾召宗老而屬之曰祭我必以芟及祥宗
老將薦芟屈建命去之曰夫子不以私欲干國之典也

靈均主盟

楊廷秀食菱詩雞頭吾弟藕吾兄頭角嶄然也不爭白
壁中藏烟水晦紅裳左袒雪花明一生子木非知已千
載靈均是主盟每到炎官張火傘西山未當聖之清

勸民畜菱

漢書龔遂字少卿為勃海太守勸民秋冬益畜果實菱
芡

募民種菱

蘇子瞻知杭州募民種菱于西湖而收其利以備修堤
海上充食

呂氏春秋杜厲叔事莒公自以為不見知居海夏食菱
冬食橡栗

道中作飯

梁書魚弘為湘東王鎮西司馬述職西上道中乏食緣
路採菱作飯給所部

引蔓爭角

張俞詩青菱引蔓空爭角

懷珠韞玉

楊誠齋食老菱有感幸自江湖可避人懷珠韞玉冷無
塵何須抵死爭頭角荇葉荷花老此身

芡實

格物總論南楚謂之雞頭北燕謂之蓂淮徐泗之間
謂之芡葉似荷而大葉上感衄如沸貼水而平莖與
苞皆有芒刺其苞恰如雞頭一名雞壅內著子如指
頭大顆圓而色褐有殼其間肉白如米可以濟饑

鴻頭

周禮注芡雞頭一名鴈頭故韓退之聯句鴻頭排刺芡
山谷詩剖蚌煮鴻頭

蝟腹

姜梅山詩蝟腹出波烹芡實馬蹄和露滴蓮房

剖膏液

蘇子由食雞頭詩芡葉初生皺如縠南風吹開輪脫輻
紫苞青刺攢蝟毛水面放花波底熟森然赤手初莫近
誰料明珠藏滿腹剖開膏液尚模糊大盍磨聲風雨速
飽珠璣

楊廷秀食雞頭詩龍宮失曉惱江妃也養鳴雞報曉輝

要啄稻梁無半粒只教滿頷飽珠璣

晝合宵炕

埤雅荷花日舒夜斂芡花晝合宵炕此陰陽之異也

擘金傾琲

楊廷秀食雞頭詩江妃有訣煮真珠菰飯牛酥軟不如
手擘雞頭金五色盤傾驪頷琲千餘夜光明月供朝嚼
水府靈宮恐夕虛好與藍田食玉法編歸辟穀赤松書

橄欖

草木狀橄欖子大如棗兩頭尖青色二月華八九月
熟味酸蜜藏乃甜矣

閩中尤重

嶺表異錄橄欖樹身聳枝高數丈閩中尤重其味咀之
香口勝含雞舌核有稜內三竅有仁生啖及煮熟食之
悉解酒毒置茶中尤佳有野生者子繁樹峻不可梯緣
但刻其根下方寸納鹽于其中一夕子皆落

江南最珍

王元之詩江南多果實橄欖最珍奇北人將就酒食之
先顰眉皮肉苦且澁瀝口復棄遺良久有回味始覺甘
如飴我今何所喻喻比忠臣辭直道逆君耳斥退投天
涯世亂思其言噬臍焉能追寄語採詩官毋輕橄欖詩
久方和

歐陽永叔詩五行居四時惟火盛南訛炎焦凌木氣橄
欖得之多酸苦不相入初爭久方和霜苞入中州萬里
來江波幸登君子席得與衆果羅

甘莫敵

梅聖俞詩南國青青果涉冬如始摘初咀澁難任竟嘗

甘莫敵

翠顥

劉貢父詩青膚鏤瓊瑩翠顥森齒齒苦為幽人貞久見

君子淡

青子

東坡詩紛紛青子落紅鹽正味森森苦且嚴待得微甘

回齒頰已輸崖蜜十分甜

餘甘瓜葛

山谷詩方懷味諫軒中果忽見金盤橄欖來想共餘甘
有瓜葛苦中真味晚方回按餘甘亦果名子如彈丸大
理如定陶瓜本草所謂菴摩勒即此雲南記瀘水南有
餘甘子樹色微黃味酸苦核五稜又按山谷集戎州蔡
次律家軒外植餘甘余名其軒曰味諫軒

餘甘苗裔

劉屏山詩炎方橄欖佳餘甘豈苗裔風姿雖少殊氣韻
乃酷似

甘蔗

說文諸蔗也本草赤者名崑崙蔗白者名荻蔗格物
叢話蔗有紫色者有青色者竿取其汁過樟木槽取
而煎之即可成飴今砂糖冰糖是也

析醒

漢郊祀歌百味旨酒布蘭生泰尊柘漿析朝醒又元稹

詩甘蔗消殘醉

愈疾

野史盧絳中疴疾夢一白衣婦人頗有姿色謂之曰子之疾食蔗即愈既詰朝見鬻蔗者絳揣囊中且乏一錙唯有唐韻一冊遂請易之其人曰吾乃負販者將此安用哀君欲之遂貽數挺絳喜而食之至旦疾愈

交趾數寸

吳錄交趾所生者圍數寸長丈餘取其汁曝之數日可

成飴入口即消彼人謂之石蜜

扶南三節

世說扶南蔗一丈三節見日即消見風即折

愷之倒啖

世說顧愷之為虎頭將軍每啖蔗自尾至本或問之曰
漸入佳境清異錄丘鵬南出甘蔗啖朝友云黃金顙

宣都挿射

齊宣都王鑑取甘蔗挿百步射之十發十中

太武求蔗

魏史元嘉二十七年魏太武引兵攻彭城求甘蔗于武陵王駿駿命與之

代宗賜蔗

郭汾陽在汾上代宗賜甘蔗二十條

因糖為霜

王灼譜唐大歷間有僧號鄒和尚跨白驢登繖山結茅以居須鹽米薪菜之屬即書寸紙繫錢緡遣驢負至市

區人知為鄒也取平直掛物于鞍縱驢歸一日驢犯山下黃氏蔗苗黃請償于鄒鄒曰汝未知因蔗糖為霜利當十倍吾語汝塞責可乎試之果信自此流傳其法

雜瓜作酒

容齋隨筆唐赤土國用甘蔗作酒雜以紫瓜根

叢生

格物論蔗叢生畦而種之身似竹而實初出地節頗密自後一節疎一節清異錄湖南馬氏有雞狗坊長能種

子母蕉

庶出

野史宋神宗問呂惠卿曰何草不庶出獨于蕉為庶出何也對曰凡草植之則正生此嫡出也甘蔗以斜生所謂庶出也

瓜

格物論瓜蒌也在地曰蒌有數種皆蔓生埤雅瓜性惡香尤忌聞麝氣觸之乃至一蒂不收

祭上環

禮玉藻瓜祭上環注云上環謂橫切之圓如環也

覆用絺

見絺綌

曾子芸

家語曾子芸瓜誤傷其根曾皙怒大杖擊其背曾子仆地有頃而蘇

焦華夢

孝子傳焦華西秦時人父遺嘗病甚冬仲思瓜求之不得忽夢一人黃冠謂曰聞子父病思瓜故送瓜以助子華拜受之及寤瓜在手馨香非常父食而病愈

輿父守

爾雅權輿父守瓜注云今瓜中黃甲小蟲好食瓜葉故名守瓜形類螢而小又崔氏月令種瓜用戊辰日

織女主

續漢書牽牛星主關梁織女星主瓜果

東陵五色

見隱士又阮籍詩昔聞東陵瓜近在青門外連畛距阡陌子母相鉤帶

會稽五色

任昉述異記吳桓王時會稽生五色瓜

視瓜坑儒

史云秦始皇密令人種瓜于驪山硎谷中溫處瓜實成子使人上書曰瓜冬實有詔下博士諸生說之人人各

異使往視之而先為伏機于彼諸生皆至方相難不決
因發機從上填之以土皆壓死

獻瓜得官

見濫官

化魚

莊子曰朽瓜化為魚物之變也

藏狐

宋書瓜州出大瓜狐入其中首尾不見

逐兔

見御史

揮蠅

唐武儒衡字廷碩元衡從弟也為中書舍人時膳部郎
中元稹知制誥用宦官魏弘簡以進時論鄙之儒衡會
公堂有蠅集于爪揮以扇曰適從何來遽集于此一座
愕然

朱陵

漢武帝外傳西王母謂上元夫人曰共造朱陵山食靈
瓜其味甚美憶此已七千歲矣

黃臺

見樂章

乞瓜得墓

幽冥錄富春孫鍾奉母至孝種瓜為業忽有三少年來
乞瓜鍾為設食出瓜禮敬甚慇三人臨去曰我等司命
郎感君厚意示君葬地使連世封侯數世天子出門化

成白鶴而去後鍾生權權生亮亮生休

種瓜舉葬

沈約宋紀韓靈珍至孝母亡家貧無以葬與兄共種瓜
半畝朝採暮復生葬事由此得舉

四劫一實

漢武帝內傳僊之上藥有空同靈瓜四劫一實

異本同蒂

白帖漢哀帝二年瓜異本同蒂共生一實時以為佳瓜

又唐書貞元四年夏右神策軍獻瑞瓜三蔓合為一蒂而生三瓜

花紅葉素

洞冥記有龍肝瓜長一尺花紅葉素生于冰谷

外偉內醲

張載瓜賦或玄表丹裏呈素合紅豐肌外偉綠瓠內醲
狸首虎蟠

陸機瓜賦金文蜜甯小青大班玄肝素腕狸首虎蟠又

裴淵廣州記州有一種瓜金色名金釵

龍蹄羊髓

廣志瓜之所出以遼東廬江燉煌之種為美有烏瓜魚
瓜羊髓瓜龍蹄瓜大如斛

削瓜侵肉

見慳吝

剖瓜傷指

唐史思明之亂陷沒河南失代宗皇后沈氏所在德宗

即位令咨訪高力士女嘗從后遊年狀差似后削脯哺
帝傷左指高女亦剖爪傷指

悲任

梁任昉亡高祖方食西苑綠沈瓜聞知投爪于盤悲不
自勝

祭杜

唐杜如晦薨太宗食瓜美輟其半使置靈座祭之

通玄

黃庭內經注大霍山下有洞臺乃司命君之府也中有神靈爪食之心通至玄

乞巧

見七夕

王濬園

王濬園生嘉瓜一莖二實又柳子嘉瓜表序河東觀察使賈全所進嘉瓜乃越州山陰縣杉風鄉百姓王獻朝園內所產二實同蒂圖以示百寮

緱氏圃

唐史明崇儼有道術四月間帝憶瓜崇儼索百錢須臾以瓜進曰得之緱氏老人圃中帝召老人問故對曰嘗埋一瓜失之土中得百錢云

遺母

南史滕曇恭年五歲母患熱病思食寒瓜土俗不產曇恭歷訪而不得俄遇一桑門曰我有雙瓜願分一相遺曇恭持歸舉家驚異

奉君

後魏書郭祚領太子少保從世宗幸東宮肅宗方幼弱祚懷一黃酥奉焉時人號為黃酥少保

二月已進

唐置溫湯監監丞種瓜蔬隨時貢奉故王建宮詞內園分得溫湯水二月中旬已進瓜

三年一熟

白六帖積石山瓜三年一熟

斬瓜試劍

南漢劉晟嘗夜飲大醉以瓜置伶人尚玉樓項拔劍斬
瓜以試劍因斬其首

饅瓜名亭

見亭

與上對食

齊書武帝未即位時與到撫同從宋明帝射雉郊野渴
倦撓得青瓜與上對剖食之及帝即位三遷司徒左長

史憶舊也

恣人來取

道學傳褚雅字玄通與人共居常取水洒掃或夏月種
瓜恣人來取

僊人賭

列僊傳服閭者往來海邊諸祠中見二僊人于祠中博
賭瓜顧閭使擔黃瓜數十頭令瞑目乃上方丈山

子弟戰

清異錄吳越稱雪上瓜錢氏子弟逃暑取一瓜各言瓜
子的數言定剖觀負者張宴謂之瓜戰

目百子瓮

清異錄果子中子繁者惟夏瓜冬瓜石榴故嗜果者目
瓜為百子瓮

名獨子青

清異錄遼東一處有瓜實成破為十段若段中止有一
子而長可數寸人食一顆可作十日糧國人珍之名獨

子青

山堂肆考卷二百八

欽定四庫全書

山堂肆考卷二百九

明 彭大翼 撰

樹木

松

格物總論松樹礪柯多節皮極麤厚望之如龍鱗盤
根膠枝四時青青不改柯葉春二三月抽蕤生花結
子然有數品或二針或三針或五針三針者謂栝子
松五針者謂崧子松

施女蘿

詩小雅薦與女蘿施于松柏

化茯苓

玄中記松脂淪入地中千歲為茯苓神淮南子曰千歲之松下有茯苓上有兔絲抱朴子曰松三千歲者皮中有聚芝如龍形名曰飛節芝

馬鬣

廬山記西嶺松如馬鬣

塵尾

廬山記石門澗有松林仰視之離離如駢塵尾又陳書
張譏字直言後主幸鍾山開善寺召從臣坐于松下敕
譏監議時索塵尾未至後主令取松枝屬譏曰可代塵
尾

偓佺食實

列僊傳偓佺食松實飛行速走馬以松子遺堯堯不能
服時受服者皆至三百歲

伏生啖脂

列僊傳伏生在湯時為木正常食松脂

化青牛

嵩山記大松千歲化為青牛為伏龜

遊白兔

漢書方儲字聖明丹陽人除郎中遭母憂歸里負土成墳種松栢奇樹千株鸞鳳棲其上白兔遊其下

封大夫

見泰山

比君子

孫卿子曰歲不寒無以知松栢事不難無以知君子

陶院

梁陶弘景特愛松風庭院皆植松每聞其聲欣然自樂
孫齋

世說孫興公齋前種松一株恒自手擁治之時高世遠
與之隣居語孫曰松樹子非不楚楚可憐但永無棟梁

之用耳孫曰楓柳雖合抱亦何所施

徐墓

豫章記徐孺子墓在郡東唐杜牧為守于墓前植松

秦廬

泉州志秦系結廬于九日山有大松百餘章俗傳東晉時所植

草不殖

左襄二十九年鄭行人子羽曰松栢之下其草不殖

土不肥

說苑智襄子為室美士茁曰記有之高山峻原不生草木松柏之地其土不肥今土木勝人臣懼其不安也

百木長

史記松柏為百木長也而中宮闕又清異錄張薦明隱山林有古松十餘株謂人曰予人中之僊此松木中之僊也

千歲材

東坡種松詩孤根裂山石直幹排風雷我今百日客養
此千歲材

符丘

符子與玄子登乎泰山下臨千仞之淵上蔭百仞之松
蕭蕭然神王乎一丘矣

甄兆

後魏書甄琛喪父瑩兆之內手植松栢

淵明盤桓

歸去來辭撫孤松而盤桓

斯立吟哦

見縣丞

秦皇馳道

漢賈山上書秦為馳道厚築其外隱以金椎樹以青松
為馳道之麗使後世曾不斜徑而託足焉

梁帝山陵

金樓子梁武帝每拜山陵涕淚所灑松為變色

鶴樓

白帖千歲之鶴樓于松栢之上

鸞倚

韓詩青鸞倚長松

偃蓋

金陵記芳山有野人見一使者異服牽一白犬野人問
居何地荅曰居偃蓋山隨至古松下而沒松形果如蓋
意使者乃松精犬乃茯苓耳

落釵

唐韓偓詩長松夜落釵千股

化石

唐書僕骨東境其地東北一千里有康干河斷松木投之一二年乃化為石其色青謂之康干石有松文

蔭山

宋王介甫因道傍大松人取為明作詩云虬角龍鬚不可攀亭亭千丈蔭南山應嗟無地逃斤斧豈願爭明燭

火間

塚上西廡

塚墓記東平王歸國每思京師後薨葬于東平塚上松栢皆西廡

寺中東向

見僧

丁固夢生

見夢感

山濤手植

晉山濤年老居母喪過禮手植松栢

李泌養和

李泌常取松樛枝以隱背名曰養和後得如龍形者因以獻帝

君謨蔽歆

郡志蔡君謨為閩部使者夾道種松以蔽歆毒人至今賴之

勁節直心

梁范雲詩淩風識勁節負霜知直心

蒼顏瘦甲

宋劉彥沖詩風韻颼颼遠更清蒼顏瘦甲聳亭亭

奏笙簧

杜詩疎松隔水奏笙簧

鳴鼓吹

黃山谷詩盤空作風雨發地鳴鼓吹

聲清心耳

李白詩南牕蕭瑟松聲起憑誰一聽清心耳

影動龍蛇

石曼卿詩直氣森森耻屈盤鐵衣生澁紫鱗乾影搖千尺龍蛇動聲撼半天風雨寒

怪松贊

陸龜蒙贊松生險隘岩獄穴械病乎不快卒以為怪擁腫支離神羞鬼疑道人咨嗟筆傳其奇或怪于形或奇

于辭吾為怪魁是以贊之

偃松篇

兩京記唐蔡孚有偃松篇玄宗和之刻于石

栖日榦

孟郊袁松詩近世交道喪青松落顏色人心忘孤直木
性隨改易既摧栖日榦未展擎天力終是君子材還思
君子識

戛雲姿

符載植松論是木有曼雲之姿有構厦之材繩墨太速
恐天其理今除于庭除之間充耳目之玩常見狎近氣
色不振若徙於高岱之間沆瀣之華注于內日月之光
薄于外祥鸞噉噉戲于上流泉湯湯鳴其下巖岫重複
漠漠然清淨靈風四起聲掩竽籟是時也當境勝神王
拔地千丈根實黃泉枝摩青天則可以柱明堂而棟大
厦也

岳神移栽

元珪法師坐禪于巖阿下忽有岳神拜師曰特來請受
正戒師付戒畢神曰願展小神通師曰我東嶺無松此
處多松汝能移于東嶺乎神曰敬聽命願勿恐怖神拜
辭而去是夜雷雨交至次日見巖前松皆移于東嶺

沙彌孝感

唐沙彌性至孝母劉氏亡墓前忽生松栢十餘株人以
為孝感所致

青州貢

夏書青州厥貢岱畎絲枲鉛松怪石

冀州材

周禮冀州其材松栢

徂徠山

詩魯頌徂徠之松新甫之栢新甫亦山名

銅鞮路

後魏書彭城王勰從幸代都次于上黨之銅鞮山路傍
有大松十餘株帝行而賦詩令人示勰且令和之曰比

至吾所即當就時颺去帝十餘步且行且作未至帝所
即就曰問松材經幾冬山川如何昔風雲與古同帝曰
此詩亦責吾耳

栢

栢與松不同松皮麤厚栢皮光滑栢葉曲身直松葉
直身曲栢性堅緻有脂而香古人破為暢白用以擣
鬱栢一名栢襍記所謂暢白以栢是也

荊州貢

夏書荊州厥貢杻榦栝栢

冀州材

見松

殷社

論語殷人以栢

漢陵

三輔舊事漢諸陵皆屬太常有人盜其栢樹者棄市

孔子廟

魯郡孔子舊廟有栢二十四株歷漢晉間其大連抱土人崇敬之莫敢犯也

諸葛祠

杜子美題孔明廟前古栢丞相祠堂何處尋錦官城外栢森森

挂劍

見墳墓

埋鐵

異聞錄桑道茂居有二栢甚茂曰人居而木蕃者去之
木盛則土衰土衰則人病乃以鐵數十斤埋之復曰後
有發其地而死者太和中溫造居之發藏鐵而造死

後凋

論語歲寒然後知松栢之後凋也

倒生

抱朴子曰天陵偃蓋之松大谷倒生之栢與天齊其長
與地等其久也

穆滿降休

穆天子傳甲申天子升于大北之墜而降休于兩栢之下按大北太行山也

漢光問數

後漢書陳留虞延為郡督郵光武巡狩至外黃問延園陵栢樹株數延悲曉之由是見知

造殿

漢武帝造栢梁殿栢梁臺香聞數十里

作堂

燕譚孤山有陳朝栢二株其一為人所薪僧志詮作堂其側名曰栢堂東坡為作二詩

鵲立

漢武帝宴未央前殿雨新止東方朔執戟在殿階獨語上呼問之答曰殿後栢樹有鵲立枯枝上向東鳴上遣視如朔言上問何以知之朔曰以人事言之風從東方來鵲尾長背風則蹶必當向風而立是以知東向鳴新

雨生枝滑枯枝澁是以知立枯枝上大笑

烏棲

見御史大夫

食葉朝真

雜說田鸞入華山見黃冠師師語曰栢葉長生藥也因
教以服食之法後得道朝上真

攀樹哭父

見子

泰山千樹

山南有泰山廟種栢千樹

華林二株

晉華林園有栢樹二株

棟梁器

齊書王儉字仲寶司徒袁粲見之曰宰相之材也枯栢
豫章雖小已有棟梁之器

龍虎姿

杜子美病栢詩有栢生崇岡童童狀車蓋偃蹇龍虎姿
主當風雲會

忽變梧桐

齊書王宴為員外郎父普曜齋前栢樹忽變成梧桐論
者以為梧桐雖有棲鳳之美而失後凋之節宴後果不
能善終

至比甘棠

寇萊公知巴東縣嘗手植雙栢于縣庭至今民比之甘

崇謂之萊公栢後巴東大火栢與公祠俱焚明年莆陽
鄭贛來巴東為令悼栢之焚惜公手植不忍剪伐種凌
霄花于下使附榦而上以著公之遺德且慰邦人之去
思云

脩栢賦

齊書江夏王綰以明帝擅權忽忽不樂著修栢賦以見
志云既殊羣而抗立亦含貞而挺正豈春日之自芳亦
霜下而為盛衝風不能摧其枝積雪不能改其性雖墮

拏當年庶後凋之可咏

古栢行

杜子美古栢行孔明廟前有老栢柯如青銅根如石霜
皮溜雨四十圍黛色參天二千尺大厦如傾要梁棟萬
牛回首丘山重不露文章世已驚未辭剪伐誰能送苦
心豈免容螻蟻香葉終經宿鸞鳳志士幽人莫怨嗟古
來才大難為用

新甫山

見松

平泉莊

李德裕平泉莊有鴈翅檜珠子栢

檜

格物論檜皮光葉尖硬如芒刺四時不彫

太清左紐

太清記亳州太清宮有八檜老子手植根株枝幹皆左紐石曼卿集此檜不知年代李唐之盛一枝再生至聖

朝復有此異

列帝獨孤

常州列帝廟有獨孤檜潁州靈臺觀有再生檜

翠為蓋

郭公父詠蔣公檜詩淮南庭中有蒼檜仰視團團翠為蓋直榦每容鸞鳳棲盤根深壓鯨鰲背

根如輪

蘇頌濱詩君家大檜長百尺根如車輪身弦直壯夫連

臂不肯抱孤鶴高飛直下立

備松栢體

東坡題亳州老君觀左紐檜詩汝陰多老檜處處屯蒼
雲地連丹砂井物化青牛君時有再生枝還作左紐文
王孫有喜書室延清芬應憐四孺子不墮凡木羣體備
松栢姿氣合芝朮薰初扶鶴立骨未出龍纏筋巢根白
蟻亂網葉青蟲紛乃知蔽芾初甚要封植勤他年皮三
寸孤鼠子不聞

散風雨聲

陳后山次韻咏趙德麟植檜緬懷萬仞巔千丈蔚蒼翠
蟠根泉石底用意霜雪外寧須大厦材坐待斧斤至散
為風雨聲密作馬牛蔽又秦韜玉檜詩宰雲交榦庾輪
囷嘯雨吟風已百春深蓋屈盤青塵尾老皮張展黑龍
鱗唯將寒色資琴興不放秋聲染俗塵歲月如波事如
夢竟留蒼翠待何人

槐附杉

春秋說題槐者虛星之精

王門

金匱書武王問太公曰天下士人來甚衆何以待之太公曰請樹槐于王門內有益者入無益者拒

公位

周禮朝士面槐三公位焉

聽訟

春秋元命苞樹槐聽訟其下注云槐之為言歸也情見

歸實也

議經

見市

醉傷

晏子春秋齊景公有所愛槐令人守之曰犯槐者刑傷槐者死有醉而傷者且加刑焉犯者之女說晏子曰妾聞明君不以禽獸殺人今君以樹木之故殺妾父妾恐害明君之政損明君之義晏子早朝而復其言于公公

乃令吏罷守槐之役出犯槐之囚

觸死

見義士

晝聶宵炕

爾雅守宮槐葉晝聶宵炕注云晝聶宵炕言晝日聶合而夜舒布也江東有槐與此相反名曰合昏槐

兔目鼠耳

淮南子曰槐之生也入季春五日而兔目十日而鼠耳

更旬而始規

取火

周禮夏官司燿掌行火之政令冬取槐檀之火

招涼

清異錄崔鳳蹉跎失志洛陽有天親觀頗幽雅常陪友
生夏月招涼于古槐之下戲曰予不登九品此槐不得
為手版想亦為吾助不平也是後朋徒呼槐為不平生

服實

梁庾肩吾服槐實年七十餘目看細字毛髮皆黑

為薪

唐貞元中度支欲取兩京道中槐樹為薪先下符牒于
渭陽縣張造造牒曰召伯所憩尚勿剪除先皇舊遊豈
容斬伐遂止

祖雄廬側

南史祖士雄廬側有槐先自榮茂及士雄居喪槐忽枯
死服闋還茂高祖嘉之名其里為累德里

王祐庭前

見三公

街樾蒔槐

見兵部尚書

堠處植槐

後周書韋孝寬為雍州刺史先是路側每一里置一土堠經雨易敗必用修葺孝寬勒部內當堠處植槐樹既免修葺行人又得庇蔭

被宸

何晏景福殿賦槐楓被宸

蔭殿

梅聖俞宮槐詩漢家宮殿蔭長槐嫩色葱葱不染埃天
仗龍旗穿影去鈎陳豹尾拂枝來青蟲挂後蜂銜子素
月生時桂並栽我意方同杜工部冷淘惟喜葉新開按
杜以槐葉作冷淘故云

槐頌

晉摯虞連理槐頌東宮正德之內承華之外槐樹二株
連理而生二榦一心以蕃本根

槐賦

晉王濟槐賦龍升南陸火集正陽鼓柯命風振葉致涼

雲屯

韓詩夏槐作雲屯

月掛

東坡御史臺槐詩憶我初來時草木向衰歇高槐雖驚

秋晚蟬猶抱葉淹留未云幾離離見疎筵棲鴉寒不去
哀叫饑啄雪破巢帶空枝疎影挂殘月豈無兩翅羽伴
我此愁絕

幽姿

已下杉

韋應物詩擢榦方數尺幽姿已蒼然

直理

格物論杉樹大者數圍高十餘丈紋理條直皮麤厚葉
尖附枝生若針刺然青青不彫種蒔宜在山窠深處南

方人造屋為船多用之出于東海中倭國者尤佳名曰倭木

干雲霄

白樂天詩勁葉森利劍孤根挺瑞標纔高四五尺勢若干雲霄

諳風雪

潘紫巖詩何代移來得許長想渠歷晉復經唐慣于巖畔諳風雪不與人間作棟梁二室七僊同守護千松萬

檜自低昂向來諸葛祠前栢此物當為伯仲行

椿

附石楠

格物論椿樹枝葉與樗相似樗木踈而氣臭椿木實而葉香無花不結子木身大而榦端直其有花而木身小榦多天矯者樗也石楠葉如枇杷有小刺凌冬不凋春生白花秋結細紅實

大椿

見祝壽

靈椿

東坡詩從今八十歲合抱是靈椿

我我

宋晏元獻詩我我楚南樹杳杳含風韻何用八千秋騰
凌詫朝菌

奕奕

宋劉原父詩野人獨愛靈椿館館西靈椿聳危榦風揉
雨煉三月餘奕奕中庭蔭華傘

仙人手植 已下石楠

成都國寧觀有古楠四石刻云仙人遽君手植

郡人力全

宋陸游石楠記予在成都嘗以事至沈犀過國寧觀有石楠四皆千歲木也枝擾雲漢聲戛風雨根入地不知幾百尺而陰之所庇車且百兩予愛而不能去者彌月欲為作詩文會多事不果嘗以語道人遽昌老竊以為恨予既去蜀三年而昌老萬里以書屬予曰國寧之楠

幾伐以營繕郡人力全之僅乃得免懼卒不免也子為
我終昔日之意乎予發書且嘆且喜曰勿剪鵲棠恭敬
桑梓愛其人及其木自古已然姑以蜀事言之則唐節
度取孔明祠栢一小枝為手板書于圖志今見非詆蔣
堂守成都有美政止以築銅壺閣伐江瀆廟木坐謠言
罷且王建孟知祥父子專有四南窮土木之力沈犀近
在國城數十里間而四楠不為當時取彼猶有畏而不
敢者況今聖主以恭儉化天下豈其殘滅千載遺跡侈

大棟宇為王孟之所難哉意者情出于吏胥梓匠欺罔
專恣以自為功而已使有以吾文告之者讀未終篇禁
令下矣然則其可不書

吐艷流珠

孟郊石楠詩籠籠抱靈秀簇簇抽芳膚寒月吐再艷頰
子流細珠鴛鴦花數重翡翠葉四鋪雨洗新妝色一枝
如一株聳異敷庭院傾研來座隅散彩飾几案餘輝盈
盤盂

摩天盤地

杜子美枯楠詩上枝摩蒼天下根盤厚地巨圍雷霆折
萬孔蟲蟻萃凍雨落流膠衝風奮佳氣白鶴遂不來天
雞為愁思猶含棟梁具無復霄漢意

千燈焰

白樂天詩傘蓋低垂金翡翠薰籠亂搭繡衣裳春芽細
炷千燈焰夏蕊濃薰百和香

一蓋青

杜子美詩枏樹色冥冥江邊一蓋青近根開藥圃接
葉製茅亭落景陰猶合微風韻可聽尋常絕醉因卧
此片時醒



山堂肆考卷二百九

欽定四庫全書

子部

山堂肆考卷二百十一

詳校官中書

臣

閔思毅

主事

臣

祁韻士履勘

總校官降調編修

臣

倉聖脈

校對官中書

臣

葉蘭

謄錄監生

臣

鄧培善

欽定四庫全書

山堂肆考卷二百十

明 彭大翼 撰

樹木

楓 附冬青

楓樹似白楊葉圓而岐分三角有脂而香每至秋杪
其葉皆赤簇簇如錦爛然可觀其子如鴨卵二月花
發著實九月熟曝乾可燒說文木厚葉弱枝善搖一
名攝攝蓋楓攝天風則鳴故云冬青樹一名女貞木

一名萬年枝

桎梏化

山海經黃帝殺蚩尤棄桎梏化為楓又軒轅本紀黃帝殺蚩尤于涿鹿之野擲其器械于東山之上一夕風雨大作器械盡化為楓樹滿山

宮殿植

漢宮殿中多植楓故曰楓宸至霜後葉丹可愛騷人多稱之

化羽人

宋齊丘化書老楓化為羽人述異記老楓為人形曰靈
楓

送遠客

魏簡文帝詩萋綠映葭青踈紅分浪白落葉洒行舟仍
持送遠客

鳳集

後周武帝時梁州上書鳳集于楓上羣鳥列侍以萬數

猿吟

元次山詩千里楓林烟樹深無朝無暮有猿吟又杜詩
赤葉楓林百舌呼

露凋

杜詩玉露凋傷楓樹林

霜墜

名賢集一夕起霜風千林墜曉紅無端逐流水更向武
陵東又杜荀鶴詩遠上寒山石徑斜白雲深處有人家

停車坐愛楓林晚霜葉紅于二月花

庭階多植已下冬青

蘇彥頌序負霜蕊翠振柯凌風故清士欽其質貞女慕
其名多植之于階庭云

霜霰不凋

許渾詩霜霰不凋色兩株交石壇未秋紅實淺經夏綠
陰寒

榆附漆

爾雅榆白粉先生花後着筴皮白色三月筴生如小
錢

鵲起

莊子曰鵲上高城之危而巢於高榆之巔城壞巢折凌
風而起故君子之居世也得時則蟻行失時則鵲起

蟬鳴

韓詩外傳楚莊王將伐晉令曰敢諫者死孫叔敖諫曰
臣園中有榆柳上有蟬方奮翼悲鳴飲清露不知螳螂

之在其後也

取火

周禮司燿掌行火之政令春取榆柳之火又古詩春榆
初改火

食皮

天文志漢成帝時旱傷麥民食榆皮

為籬

魏志鄭渾為魏郡太守乏材木課百姓植榆為籬

覆屋

東坡御史臺榆詩我行汴堤上厭見榆陰綠千株不盈
畝斬伐同一束及居幽囚中亦復見此木蠹皮溜秋雨
病葉埋牆曲誰言霜雪苦生意殊未足坐待秋風至飛
英覆空屋

干虹

張右史詩脩柯遇雲日老枿干虹霓嗟爾擁腫材大匠
何見遺

飛雪

韓退之詩楊花榆莢無才思也解漫天作雪飛

拋錢

白樂天詩榆葉拋錢柳展眉又隔牆榆葉散青錢

懸屨

清異錄金鄉路上一老榆往來者就樹下易草屨例以
其舊屨懸而去行人指為鞢鞢樹

短貫穿

白樂天詩錢穿短貫榆

夾道植

石虎鄴中記襄鄴間千里之中央道植榆盛暑之月人行其下

汁可髹物已下漆樹

格物論漆樹身如柿葉亦近似其汁可以髹物以竹筒釘入木中取之人多種於山谷間

葉可為散

後漢方藝傳樊阿從華佗求方可服食有益千人者佗以漆葉為青黏散與之

樊侯種

後漢樊宏父重嘗欲作器物先種梓漆時人嗤之積以歲月皆得其用向之笑者咸求假焉貨至鉅萬追爵謚為壽張敬侯

南華憂

朱文公漆園詩舊聞南華僊作吏漆園裏應悟見割憂

嗒然空隱几

桐

附梓

瑞應圖王者任用賢良則梧桐生于東廂禮斗威儀
君乘火德而王其政平梧桐生

中瑟

夏書嶧陽孤桐注云嶧山之陽特生桐中琴瑟

剪珪

見親生

生朝陽

詩大雅梧桐生矣于彼朝陽按山之東曰朝陽

出太冥

張協七命寒山之桐出自太冥含黃鍾以吐幹據蒼岑
以孤生

乳可致巢

莊子曰空門來風桐乳致巢注云門戶空風喜投之其
子似乳著葉而生鳥喜巢之

材難為弩

淮南子曰智者有所不及故桐不可以為弩

成雲

淮南子曰桐木成雲注云取十石甕滿以水置桐其中
蓋之三四日氣如雲作

知月

遁甲梧桐不生九州異居注云梧桐樹知日月正閏其
樹生十二葉一邊有六葉則知無閏有閏則生十三葉

從下數起每葉為一月視葉小者則知閏在何月

龍門百尺

枚乘七發龍門之桐高百尺而無枝

吹臺百圍

遊名山志吹臺有高梧皆百圍

夫差別館

吳王別館有楸梧成林焉古樂府梧桐秋吳王愁是也

苻堅阿房

秦記長安謠曰鳳皇鳳皇止阿房苻堅遂于阿房植樹
數萬株以待之其後慕容冲入阿房城而止焉冲小字
鳳皇

吳平門外

異苑吳平門外忽生青桐一株上有歌謠之聲平惡而
伐之平隨軍與北兵三戰忽空中似歌曰死樹今更青
吳平尋當歸適聞伐此樹已復有光輝平果得歸

劉靖廊邊

清異錄同州郃陽縣劉靖家兄弟同居宅邊榆樹上生桑西廊梧桐生穀枝明年墳中白楊生檜並鬱茂相若鄉人號榆為義祖桐為小義白楊為義孫分先後也縣令出官錢為修三義亭

折枝

襍記歷城房家園乃齊博陵君豹之山也其園襍樹森列或有人折其桐枝者君輒曰何為傷吾鳳條

飄葉

蜀人侯繼圖倚大慈寺樓偶飄一大桐葉上有詩云拭
翠欵娥眉為鬱心中事搦管下庭除書作相思字此字
不書名此字不書紙書向秋葉上願逐秋風起天下有
心人盡害相思死天下負心人不識相思意有心與負心
不知落何地後數年繼圖卜任氏為婚

刻木卧囚

見寬刑

破葉進帝

唐德宗在奉天召李泌赴行在時李懷光叛歲又旱蝗
議者欲赦懷光帝博問羣臣泌破一桐葉附使以進曰
陛下與懷光君臣之分不可復合如此葉由是不赦

蔭玉池

沈約咏孤桐詩分根蔭玉池欲待高鸞集

落金井

李白詩梧桐落金井一葉飛銀床

潤玄雨

魏明帝猛虎行雙桐生空井枝葉自相加通泉溉其根
玄雨潤其柯

帶晨霞

謝靈運詩桐林帶晨霞

棲鳳

毛詩注鳳凰之性非梧桐不棲非竹實不食

拂鳥

梁簡文帝詩曉葉藏棲鳳朝花拂曙烏

爰伐琴瑟已下梓木

詩國風樹之榛栗椅桐梓漆爰伐琴瑟注云榛栗二木皆可供邊實椅桐梓漆四木皆琴瑟之材也

必加恭敬

見鄉里

斬以為箏

文選斬泗濱之梓以為箏

種之作器

見漆

荆

格物論荆小木叢生枝莖婆婆娑娑葉刻缺而麤澁荒坂
洲渚多有之又有所謂牡荆杜荆山荆等其名不一

班荆

見朋友

負荆

史庶頗肉袒負荊

宮中生荊

漢書淮南安王謀逆伍被諫曰昔子胥諫吳王云臣見麋鹿遊姑蘇之臺今臣亦將見宮中生荊棘露沾衣也

門中生荊

東觀漢記尹勤治韓詩師事薛漢身牧豕事親至孝並無交游門中生荊棘

議分即枯

見兄弟

指病自愈

郡志寧浦有荊三種金荊可以作枕紫荊可以作床白
荊可以作履又有杜荊指病自愈取節不相當者月暈
時刻之與身相等置床下雖危困亦愈也

機櫬

格物論機櫬一名枅櫬高二三丈無枝榦葉長而大
歧生葉狀如車輪皮相重裏一行一皮冬月取皮可

為索也

櫟拂

杜詩注杜甫因朝廷以李林甫瑣瑣之材代張九齡為
相作櫟欄拂詩以寓意

櫟笋

東坡詩注櫟笋狀若魚子而加甘芳蜀人以饌佛僧甚
貴之笋生膚毳中蓋花之方孕者正二月間可剥而取
之過此則苦澁不可食矣取之無害于木而宜于飲食

法當蒸熟以竹笋同蜜煮醋浸可致千里外梁江淹有
頌異木之生疑竹疑草攢叢石徑森蔭山道烟岫相珍
雲壑共寶不錦不縟何遜工巧

集斧斤

杜子美詩蜀門多欂櫨高者十八九其皮割剝甚雖衆
亦易朽徒布如雲葉青青歲寒後交橫集斧斤凋落先
蒲柳

如車輪

梅聖俞詩青青機欄樹散葉如車輪擁籜交紫髯歲剥
豈非仁用以覆彫輿何憚尅厥身

夜叉頭

李羣玉與王璘聯句機欄葉散夜叉頭

僊人掌

唐庚機花詩砍破夜叉頭取出僊人掌鮫人滿腹珠
魚新出網一云劉貢父詩

贈木魚

東坡送機筍與殊長老詩贈君木魚三百尾中有鷺黃
子魚子夜叉剖癭欲分甘獐龍藏頭敢言美願隨蔬果
得自用勿使山林空老死問君何事食木魚烹不能鳴
固其理

披孔雀

洪舜俞詩舊脫敗簑亂新添華節高肅容春尚靜俠氣
夏方豪黃孕子魚腹青披孔雀尻豐撞如可製雷動景
鐘號

柳

爾雅柳醜條管子五沃之土宜柳大戴禮正月柳莢
莢發葉也埤雅楊蒲柳所謂董澤之蒲是也

展禽家植

淮南子曰展禽家植柳身行惠德因號柳下惠

女媧墳生

禊俎乾元中虢州刺史王奇光奏閩鄉縣女媧墳天寶
十三載大雨晦冥忽失所在至今河側夜聞雷風聲曉

見其墳湧出上生雙柳樹高丈餘下有巨石兼畫圖以進

亞夫營

見將帥

嵇康宅

見夏

京尹市

漢張敞為京兆尹走馬章臺街街有柳終唐世曰章臺

柳故杜詩京兆空市柳

省郎庭

孔帖韋虛心父維初為省郎時蒔柳于庭及虛心兄弟
居郎省對之歛容

樊圃

詩齊風折柳樊圃狂夫瞿瞿

蔭衢

潘岳詩弱柳蔭脩衢

狀若車蓋

隋書渤海公高潁孩孺時家有柳高百尺許亭亭若車蓋里中老父曰當出貴人後潁至宰相

狀如絲縷

齊劉俊之為益州刺史獻蜀柳數株枝條甚長狀如絲縷武帝植之于太昌雲和殿前嘗嗟翫曰楊柳風流可愛如張緒當年

東門葉

詩陳風東門之楊其葉牂牂東門之楊其葉肺肺

北郭枝

樂府詩駕出北郭門仰折楊柳枝

漢苑

溫叟詩話漢苑中有柳狀如人號曰人柳一日三起三眠故江賦云不比禁中人柳終朝剩得三眠

隋堤

隋煬帝自板渚引河達於淮海謂之御河河畔築街道

樹以柳名曰隋堤計一千三百里

養由射葉

見習射

桓溫攀條

晉桓溫北伐行經金城見少為琅琊時所種柳皆已十
圍慨然曰木猶如此人何以堪因攀枝執條泫然流涕

僵柳復起

漢上林苑中僵柳樹一朝復起生枝葉有蟲食其葉為

字曰公孫病已立及昌邑廢更立宣帝帝本名病已

枯柳復榮

見禮部侍郎

結帶

麗情集柳枝乃洛中里娘也因誦李義山燕臺詩乃折
柳結帶贈義山以乞詩

染衣

見登第

竊西門

晉陶侃鎮武昌性纖密類趙廣漢嘗課諸營種柳都尉夏施盜官柳植于已門侃後見之駐車問曰此是武昌西門官柳何因盜來此種施惶恐謝罪

種北館

南齊書王敬則嘗使魏于北館種楊柳後員外郎虞長曜北使還敬則問我昔種楊柳今各大小長曜曰彼中以為甘棠

俄生左肘

莊子曰支離叔與滑介叔觀于冥伯之丘崑崙之墟黃
帝之所休俄而柳生其左肘其意蹙蹙然惡之支離叔
曰予惡之乎滑介叔曰亡予何惡生者假借也假之而
生生者塵垢也死生為晝夜且吾與子觀化而化及我
我又何惡焉

移植永豐

唐宣宗聞樂府唱白居易柳枝詞有永豐南角荒園裏

盡日無人屬阿誰之句乃下勅移植于坊中故宋張文
潛詩永豐坊裏舊腰肢曾見青青初種時盡道路傍離
別恨爭教風絮不狂飛

賜圈辟毒

見春

著戶驅邪

齊民要術正月旦取柳枝着戶以驅百邪

灞水橋邊

宋錢思公詩章臺街裏翻輕吹灞水橋邊送落暉

長安陌上

劉禹錫楊柳枝城外春風吹酒旗行人揮袂日西時長
安陌上無窮樹惟有垂楊綰別離

黃金縷

李義山詩已帶黃金縷仍開白玉花長時須拂馬密處
可藏鴉又張于湖詩隄邊楊柳密藏鴉隄上遊人兩髻
了

綠絲條

賀知章楊柳詞碧玉妝成一樹高萬條垂下綠絲條不
知細葉誰裁出二月春風似剪刀

女兒腰

杜詩隔溪楊柳弱嫋嫋恰似十五女兒腰誰謂朝來不
作意狂風挽斷最長條

比丘頂

清異錄新栽柳樹必用泥封其頭頗類比丘頂元伯玉

宅前插柳初春吐芽伯玉曰喜得漏春和尚一一無恙
蓋取杜子美漏泄春光有柳條之句

媚眼

宋周美成賀方回詞愛日輕明新雪後媚眼星星漸欲
穿窓牖不待長條傾別酒一枝已入離人手淺淺柔
黃輕臘透過盡冰霜便與春爭秀強對青銅簪白首老
來風味難依舊

舞腰

白樂天詩葉含濃露如啼眼
枝嫋輕風似舞腰

紫筆綴巾

劉禹錫柳絮詩花巷煖隨輕舞蝶
玉樓晴拂艷粧人
紫
迴謝女題詩筆點綴陶公漉酒巾

含烟帶雨

宋呂居仁詩含烟帶雨過平橋
嫋嫋千絲復萬條
張令
當年成底事風流纔似女兒腰

桑

格物論桑皮麕枝幹修疎葉多刻缺面深綠色而有
光典術桑木者箕星之精史記齊魯千畝桑其人與
千戶侯等

沃葉

詩衛風桑之未落其葉沃若

醜條

爾雅桑柳醜條

鵠集

詩唐風肅肅鵠行集于苞桑

雉馴

見縣尹

拂日

淮南子曰扶桑在陽州日所拂

知風

古詩枯桑知天風海水知天寒

通泉

寰中記天下之高者扶桑無枝葉上至於天下通三泉
變海

見僊

生伊尹

見誕育

乳仲尼

孔演圖孔子母徵在游于大塚之陂睡夢黑帝使請已
往交語曰汝乳必於空桑覺則若有所感後生丘于空

桑之中乳產也

樹之牆下

孟子五畝之宅樹牆下以桑

種於界上

齊書襄陽土俗凡鄰居必種桑于界上以為誌韓係伯以桑蔭妨他地遷開數尺隣人隨侵之係伯輒又改種鄰人慙還所侵地

七日而拱

白帖伊陟相太戊亳有祥桑穀共生於朝七日而大拱
數日而枯

晉愍懷太子時有桑生於西廂數日而枯十二月后生
太子

子產興謫

韓非子曰子產相鄭開畝樹桑鄭人謫訾

張堪見歌

見太守上

兩兩同根

十洲記扶桑在碧海中上有天帝宮東王所治樹長數
千丈兩兩同根更相依倚僊人食其榘體作金色

枝枝相植

曹植艷歌行出自薊北門遙望胡地桑枝枝自相植葉
葉自相當

君仲供母

見子

楊沛課民

魏畧楊沛為新鄭長課民畜桑椹瑩豆積得千餘斛後
太祖軍無糧沛進之齊書沈瑀為建德令教民一丁種
桑十五株柿果亦同女丁半之頃之成林人皆歡悅

舍東羽葆

蜀志先主舍東南角籬下有桑樹高丈餘遙望童童若
羽葆車蓋往來者皆恠此樹非凡謂當出貴人先主少
時與宗中諸兒戲于樹下則曰吾必當乘此羽葆車蓋

宅南車蓋

齊書太祖宅在武進宅南有桑樹高三丈橫出四枝如車蓋太祖方數歲遊其下從兄敬宗謂曰此樹為汝生也

依之作棟

漢書陳留申屠蟠耻郡無處士遂閉門養志為蓬室依大桑以為棟梁

用以為栢

後漢書高弘為瑯琊相妻子不入官舍用桑柘盛漿
圓丘無枝

山海經東北海外圓丘之南有三桑木長百仞無枝
遼川無種

後燕錄遼川初無桑及慕容廆通于晉求種江南平州
之桑悉由吳來

山堂肆考卷二百十